

四庫全書

史部

欽定四庫全書

史部

畿輔通志卷八

詳校官監察御史臣劉人寰

檢討臣德生覆勘

總校官進士臣繆琪

校對官庶吉士臣吳裕德

謄錄監生臣何茹連

欽定四庫全書

畿輔通志卷七

宸章

世祖章皇帝

金太祖世宗陵碑文

朕惟自古膺圖受籙咸有大功德於天下其沒也弓劍
之藏後世重焉匪特陰陽之所景貺實亦遐邇之所繹
思故世代雖遙崇禮不替若聲教被於當年園寢湮於

異世非所以昭德追遠也朕撫有九有於前代陵墓未嘗不惓惓於心申敕所在守護惟謹惟金朝之陵在房山者前我師克取遼東故明惑於形家之說疑與本朝王氣相關遂劓斷其地脉又己巳歲我

太宗文皇帝統師入關念金朝先德遣王貝勒大臣詣陵致祭明復加摧毀且建立關廟為厭勝之術不達

天命之有歸而謬委靈於風水移災於林木何其誕也金朝垂祚百有餘年英主哲辟實光史冊乃異代之後兆域

荒圯祀典缺廢撫今追昔慨焉興歎金太祖世宗已經
享祀帝王廟其陵寢命地方官虔供春秋外茲特諭禮
臣專官省視修其頽毀俾規制如初并令有司時祭無
數嗚呼廟貌既崇特景仰於往哲封壤重煥用昭示於
來茲爰勒貞珉以垂不朽云爾

祭明諸陵文

維順治十六年歲次己亥十一月戊午朔越十有七日

甲戌

皇帝致祭於明成祖文皇帝仁宗昭皇帝宣宗章皇帝英
宗睿皇帝憲宗純皇帝孝宗敬皇帝武宗毅皇帝世宗
肅皇帝穆宗莊皇帝光宗禎皇帝熹宗哲皇帝曰諸帝
丕承鴻運撫有寰區蒞政理民為一代主朕巡幸畿輔
道經昌平瞻陵寢之在茲景流風而興感特以牲帛醴
齊庶品之儀用申祭享尚其歆格

祭明崇禎帝文

維順治十六年歲次己亥十一月戊午朔越十有七日

甲戌

皇帝致祭於明莊烈愍皇帝曰惟帝英姿蒞政志切安民
十有七年勵精靡懈詎意寇亂國亡身殉社稷向使時
際承平足稱令主祇以襲敝政之餘逢陽九之運雖才
具有為而命移莫挽朕恒思及憫惜良深今因巡幸畿
輔道經昌平陵寢在焉顧瞻增感特以牲帛醴齊庶品
之儀用申祭享尚其歆格

表忠錄序

自古賢臣正士效力王家率授命致身捐生赴義跡其所遭若無厚幸然而時過論定聲稱振揚及於代遠風遙流徽彌茂留連曩迹如邁其人是以孟軻有言奮乎百世之上百世之下聞者莫不興起也夫當其矢心靖獻奮不顧軀豈逆覩後人美歎靡窮哉獨以浩然之氣成特立之操內無懼心外無慚德而已顧竭志盡忠者人臣之誼善善惡惡者大道之公循省往哲愛結於中誠有不能自己者也朕萬幾之暇由繹載籍每覽忠孝

節義之事未嘗不反覆三致意焉至明史嘉靖年間有
直臣楊繼盛者以諫死於戲賢哉觀其劾仇鸞嚴嵩二
疏凜凜乎烈丈夫矣夫尊爵厚祿握權當軸者何可勝
道然當時則禁沒則已焉甚或遺穢蒙嗤為世昭鑿去
繼盛奚翅霄壤哉使繼盛獲遇明主庸其言顯其身所
建豎必有卓然可觀者而竟不得志而歿與龍逢比干
先後合轍亦可悲矣朕讀其文傷其意慨然想見其為
人故特表而出之以旌其忠鯁垂法將來由斯以觀即

謂繼盛至今存可也

楊繼盛論

朕觀有明二百七十餘年忠諫之臣往往而有至於不
畏疆禦披膈犯顏則無如楊繼盛而被禍慘烈殺身成
仁者亦無如繼盛云當是時其君端拱修元委政輔弼
而逆臣嚴嵩父子盜執大柄濁亂王家威福擅專紀綱
蕩廢在廷之臣皆泆忍阿諛奔走承順繼盛獨能伸大
義聲其十罪更彰其五姦使隱慝昭明稔惡暴白豈非

獨行不懼者哉夫繼盛特曹郎耳非有貴戚之誼股肱
之任與拾遺補闕之責也以疎逖之臣惡權寵之姦遂
思執白簡而彈去之其勢不敵夫人知之矣乃毅然不
顧且繼盛一官又非未經摧折者方仇鸞主互市議時
衆皆頰首縮頸塞默不敢異繼盛排羣說力言不可致
權臣息休刑之瀕死謫官遐方歷尉令始得至一曹郎
令他人處此且保軀固位未遑安敢復蹈前迹而繼盛
歷事未月又有舍身圖報之章蓋念君恩難負姦輔難

容建言寧計崇卑報國不憂生死洵忘身殉君忘家殉國者也且是時嚴嵩與仇鸞隙思繼盛言遂欲立貴之以為已用故數假王命內示其私繼盛倘一委蛇可立取通顯不則緘口屏息循職自効亦何所不容而乃重公室藐權門慷慨叫闈從容就義有臣如此良國之砥柱哉蓋繼盛自有生後夙罹閔凶艱苦備至故堅貞之性百折勿回可謂富貴不能淫貧賤不能移威武不能屈者矣嗟乎繼盛值諱言之朝無立言之責尚能不畏

疆禦披膈犯顏如此今之為臣者乃身任言職直節固
聞感私德而辜主恩畏權威而忘國事以視繼盛能不
灑然汗下哉朕故咏浩氣丹心之句不勝三歎為直臣
惜也順治十三年歲次丙申仲春朔日頒行

諭祭明內監王承恩文

朕嘗考諸史冊見夫忠臣烈士身殉國難名炳千載未
嘗不掩卷三歎也雖忠義之性命之於天人人可以自
盡然變亂之際利害動於中禍患怵於外依違瞻顧多

不能引決求夫風雨不渝其常霜雪不易其操者蓋難之矣若夫掖庭之中貂珥之列或恪共著美或勤慎流徽若漢之呂強唐之張承業亦可謂賢矣至於國家多難東志不移忠誠貫於金石氣節昭於日星尤足以激末流而挽頽俗也如明司禮監太監王承恩者有可紀焉當明季寇訐海內鼎沸莊烈愍皇帝勵精圖治宵旰焦心原非失德之主良由有君無臣孤立於上將帥擁兵而不戰文吏噂沓而營私以致羣寇縱橫不能奏績

逮逆渠犯闕國勢莫支帝遂捐生以殉社稷而一時戴
繼垂纓之士在平時則背公樹黨遇危難則苟且偷生
言之可為太息惟有范景文等十九人無愧臣節業賜
謚致祭以旌其忠然多士盈廷能赴義捐軀者蓋不多
見獨承恩目擊艱危從容就義從死愍帝之傍其嶽嶽
之風節即古之忠臣烈士何以加焉既乃託體山阿瘞
骸林麓永近園陵常依隧道可謂式慰幽靈用綏貞魄
者矣朕自踐祚以來斟酌前代之典章洎夫有明恒深

嘉歎其列代山陵近在畿輔向令永禁樵採守護維嚴於順治十六年因東狩駐蹕昌平觀勝國之松楸感廢邱之霜露諸陵周覽心惻久之爰至思陵念愍皇帝精勤遘亂亡國非辜躬奠椒漿尤增憫泣顧見陵側有土一坏即承恩墓也特命從臣酌酒焉邇者當省斂之時展軫宵駕載履明諸陵拜陳醑醴復徘徊於思陵之所撫荒墟而灑泣漉旨酒而痛心念茲從死之臣彌興節義之感手一卮命大臣拜奠其墓以勸忠也謚義危身

奉上險不辭難曰忠故忠君愛國庸人每未之逮貞烈之士毅然行之使百世之下聞而興起者慕誼無窮也矧承恩趨侍宮掖出入禁闈其責任不繫乎封疆名位不同乎公輔而獨能視死如歸豈非較然不欺其志者哉以視世之讀書明大義負重名者變故當前依阿泐忍幸免旦夕其為人賢不肖又何如也用是勒之貞珉使盡忠者以為勸不忠者以為戒且以告天下萬世之為人臣者

明內監王承恩碑文

朕聞烈士狗名齎志而歿貞臣衛主捐軀以從自有明
失馭寇陷都城懷宗皇帝敦國君死社稷之義崩於石
室時有司禮監秉筆太監王承恩者攀龍髯而矢志甘
雉頸以從君陪縊於傍死而猶跼嗚呼若承恩可謂事
君有禮不忘其忠者矣夫人臣事上無二厥心為其易
者與為其難者途逕若公理道則一人臣之懷有二心
者倖圖苟免甘心事讐乃在平日侈讀詩書高擁爵位

之人無論生無以為人死無以為鬼對若人其亦何地
置足耶朕殲除巨憝用彰民彝既禮葬懷宗皇帝於思
陵因賜承恩塋域一區俾葬兆外以從厥志仍錫之香
火田地暨之穹石使後世知難危之際內員中乃尚有
忠烈而死如承恩者

順治十七年九月初六日立

畿輔通志卷七

欽定四庫全書

畿輔通志卷八

宸章

聖祖仁皇帝

皇輿表序

粵稽古皇統一海寓畫疆經野建立萬國以作民極故
周禮土地之圖掌於司徒隸於小宰而左傳稱左史倚
相能誦八索九邱孔安國曰九邱者九州之志也史記

載蕭何入關收秦圖籍高帝以故具知天下阨塞是可
見有國家者封域之廣狹郡邑之興廢固不可不務遠
稽而近考也朕嘗博觀羣史上溯源流高辛創立九州
虞帝分為十二周初職方以統九服保章以辨分星昨
土列爵天下井如秦兼并六國罷封建置郡縣先王之
制至秦而一變矣自是一統之盛漢隋唐宋元明制度
遞有更革漢曰十三部唐曰十五道宋曰十五路隋則
改州為郡元則以路隸省明則革省置司其都邑變遷

紛紜鬱翳或地存而名亡或名同而地異或地析而民散莫可紀極他若三國六朝五代幅幘既隘升改寄置尤為煩冗矣朕因是簡命儒臣做史家年表法以本朝府州縣之名為經弁於其首自唐虞以迄有明之地與郡國州縣為緯分列其下朕復親加裁訂以詳以核古今輿制粲若星辰之羅於天歷歷可數也爰命曰皇輿表若夫土宇之廣北越沙漠南踰滄溟開闢以來未列版圖者咸歸籍內附以古無其名故斯表亦不能悉載焉

雖然寧獨討論之助云爾哉傳曰有德此有人有人
此有土詩曰聖敬日躋昭格遲遲上帝是祇帝命式於
九圍則撫斯表也朕敢不益博大厥德以膺茲孔厚之
版章與是為序

暢春園記

都城西直門外十二里曰海淀淀有南有北自萬泉莊
平地湧泉奔流瀾瀾匯於丹陵泝泝之大以百頃沃野
平疇澄波遠岫綺合繡錯蓋神臯之勝區也朕臨御以

來日夕萬幾罔自暇逸久積辛劬漸以滋疾偶緣暇時
於茲游憩酌泉水而甘顧而賞焉清風徐引煩疴乍除
爰稽前朝戚畹武清侯李偉因茲形勝構為別墅當時
韋曲之壯麗歷歷可考圯廢之餘遺址周環十里雖歲
遠零落故蹟堪尋瞰飛樓之鬱律循水檻之逶迤古樹
蒼藤往往而在爰詔內司少加規度依高為阜即卑成
池相體勢之自然取石甃夫固有計庸畀直不役一夫
宮館苑囿足為寧神怡性之所永惟儉德捐泰去雕視

昔亭臺邱壑林木泉石之勝繁其廣袤十僅存夫六七
惟彌望漣漪水勢加勝耳當夫重巒極浦朝烟夕霏芳
萼發於四序珍禽喧於百族禾稼豐稔滿野鋪芬寓景
無方會心斯遠其或穡徐未實暘雨非時臨陌以憫胼
胝開軒而察溝澮占離畢則殷然望詠雲漢則悄然憂
宛若禹甸周原在我戶牖也每以春秋佳日天宇澄鮮
之時或盛夏鬱蒸炎景爍金之候機務少暇則祇奉頤
養游息於茲足以迓清和而滌煩暑寄遠矚而康

慈顏扶輿後先承歡愛日有天倫之樂焉其軒墀爽塏以聽
政事曲房邃宇以貯簡編茅屋塗茨略無藻飾於焉架
以橋梁濟以舟楫間以籬落周以繚垣如是焉而已矣
既成而以暢春為名非必其特宜於春日也夫三統之
迭建以子為天之春丑為地之春寅為人之春而易文
言稱乾元統天則四德皆元四時皆春也先王體之以
對時育物使圓頂方趾之衆各得其所跂行喙息之屬
咸若其生光天之下熙熙焉皞皞焉八風罔或弗宣六

氣固或弗達此其所以為暢春者也若乃秦有阿房漢
有上林唐有繡嶺宋有艮嶽金釭碧帶之飾包山跨谷
之廣朕固不能為亦意所弗取朕匪敢希踪古人媿美
曩軌安土階之陋惜露臺之費亦惟是順時宣滯承顏
致養期萬類之乂和思大化之周浹一民一物念茲在
茲朕之心豈有已哉於是為之記而系以詩詩曰

昔在夏姒克儉卑宮亦越姬文勿亟庶攻若稽古訓是
欽是崇箴銘戶牖夙夜朕躬棟宇之興因基前代巖宿

丹霞檐棲翠靄營之度之以治蕪廢有沸泉源汪濊斯
在駕言西郊聊駐綵旂甘彼挹酌工築斯謀瑩澈明鏡
縈帶芳流川上徘徊以泳以游因山成峻就谷斯卑咨
彼將作毋曰改為松軒茅殿實惟予宜亦有樸斲予尚
念茲撰辰經始不日落成豈曰游豫燕喜是營展事

慈闈那居高明遐矚俯瞰聊用娛情粵有圖史藏之延閣惟
此大廡會彼朱褱鬱鬱溝塍依然耕鑿無假人工渺瀰
雲壑有鷓其舟有虹其梁可帆可涉於焉徜徉文武之

道一弛一張退省庶政其罔弗臧嘗聞君德莫大於仁
體元出治於時為春願言物阜還使俗醇暢春之義以
告臣鄰

萼輝園記

京師西北隅地曠而幽西山疊嶽近可指矚清泉交流
溥泓於其間林木茂密禾黍芊綿有古鄴杜之風焉朕
既築暢春園時往以省耕觀稼炎暑蒸鬱亦將以憩息
於此也東北御果園舊地以賜裕親王其地有清泉喬

木因而葺治循乎自然林樾邱壑具蕭遠之致王既為
斯園請朕名之夫詩以棠華比兄弟朕每讀詩未嘗不
三復留連思古人友愛之誼天倫之樂邕邕怡怡被於
絃誦竊欣慕焉因以萼輝名茲園蓋有取於詩人之旨
也王秉性寬和入則集議巖廊翼贊機政退居之暇澄
懷簡澹不涉外務時當風日佳美眺覽郊坰輒至斯地
蔭嘉樹鏡清流問農閱圃古人有言為善之暇想足怡
神王之游息於茲園也其猶此意也歟唐開元中營興

慶宮賜諸王第於宮側建為花萼相輝之樓史冊傳之
朕所嘉尚於是既命其名而并記其事云

鄭州水淀記

康熙十八年己未暮春之初朕萬幾有暇行幸鄭州於
是惠風拂地淑景浮空節應佳辰時登令月與羣臣春
蒐於南浦泛舟於河淀庶憑歡心以召和氣萬物暢茂
順陽和而布政三光燭耀賑貧乏以勸農雖無山林臺
閣之趣水村林藪有淳厚之俗沙鷗錦鱗互相游泳春

花野草參差萬狀觀之不足因同侍從諸臣題詩賦鼓
瑤琴俯仰古今飛觴飲宴昔人橫汾昆明之游皆所以
洽上下之情同君臣之樂豈獨流連光景已哉故記之

天津海神廟碑

朕昔巡歷天津詢知直沽海口去盛京數百里舟航泛
涉實利轉輸迺者奉錦兩郡歲穀不登兵民乏食深厯
朕懷而陸運之程踰山越谷曠日之勞厥惟創興海運
斯足拯濟民生爰命學士陶岱往蒞其事酌撥倉粟運

以巨艘出直沽之口東指遼海篙師櫂卒并力一心波濤不興天日清皎祥飈遙送帆檣如馳甫三日即達盛京賑給所暨周徧窮檐俾此京輔之邦咸與遂生樂業則惟爾海神有靈克相朕以臨茲兆庶也朕惟望秩之典國有常祀而非非常之功尤宜報享天津東舊有海神廟今特命工庀材重加營建朱甍碧瓦規制崇宏庶幾鑿茲悃忱益加祐助豈惟予一人惠鮮之意藉以有成將盛京世世軍民皆得邀神貺於勿替也是用揭諸穹

碑表神之功德以垂示永久焉

萬壽寺戒壇碑

西山地接神京嶺岫綿亘林壑深美中多精藍古刹考其歷年久遠建置自唐以來者則萬壽寺戒壇為最古寺在唐曰慧聚明正統時始易今名其地渡渾河而西山徑盤互紆回而入中復豁焉宏暢壇殿軒翼猶見古遺製深山長谷烏可少此清嚴之宇以眺覽名勝哉朕以時巡偶至斯地輒為駐輦顧近寺諸山為產煤所居

民規利日事疏斷念精舍之側鑿山採石良非所宜爰
命釐定四止而禁之俾梵境常寧舊觀弗替於以葆靈
毓秀山川當益增輝澤爾

聖感寺碑

夫以北極神京西山勝地峯巒迴互草木龍蔥晴嵐霽
雪掩映皇居秋水春華邀迎翠輦非徒百工職事瞻仰
於斯實亦九州風土形勢所在其間招提梵宇極雕梁
巨麗之竒精舍珠林盡繡楠紆迴之巧然松雲燈火不

聞禪誦之聲泉石荒臺難覓經行之蹟故雖危覺聳漢
上接雲霄而紺殿凝塵空頽歲月朕每游歷其處輒為
致慨於衷平坡寺者僻處西南遙臨宮闕刻盤螭於玉
砌丹碧流金塑寶像於琳宮輝煌映藻采摠網戶饑餒
時馴鈴鐸鳴檐野狐知肅迨時移物換雨圯風侵華棟
作爨已無往日之弘觀畫壁成泥誰識當年之璀璨寺
僧海岫篤實持躬勤勞砥行簞瓢布衲林中不演三車
瓦鉢芒屨胸次時虔五戒十載經營重新殿廡六時功

課繼廣門庭遂使清宵梵唄蕭疏盡入寒空向曉鐘聲
颯沓仍隨秋雨浮屠之傳於斯無媿朕萬幾有暇七校
偶過省耕省斂時駐蹕於茲山一豫一遊再撫臨於其
地詢知本末感佛慧之重光鑒彼勤劬啟聖功於匪懈
更名聖感特賜宸書欲使遐邇具瞻臣民共識豈若崇
祀作佞開愚氓奔走之端惟曰致敬而遠法往聖格思
之道勒諸貞珉垂感會於千秋記注瑤編志心期於一
日臣工上下咸悉朕懷

黑龍潭重建龍王廟碑

傳曰神有功德於民則祀之能捍大患禦大災則祀之非此族也不載祀典朕自御極以來夙興夜寐惟思稼穡為小民之依所期時和歲豐嘉生樂育然年穀順成雨澤是資詩曰琴瑟擊鼓以祈甘雨信乎

天心

仁愛亭毒萬物而協靈効順優渥霑足之應皆有神焉以司之亦如分猷布澤之無敢曠厥職焉距京師西三十餘里金山之麓有潭泓然以深不泛不涸前代時以

金少曰石公言
卷八
亢旱禱望其地輒能興致霖雨因名黑龍潭焉潭之側
倚山瞰壑舊有祠宇以祀其神朕數以祈雨駐蹕於茲
爰謀式廓其廟貌以昭靈貺而敬民事今者四郊之內
雨暘時若歲登大稔工適告成惟神之功德實能膏澤
田疇以福庇生民揆諸捍患禦災之義莫大於此用是
勒諸貞石垂示無窮寧不偉歟

普濟堂碑記

京師廣寧門外有普濟堂焉門臨孔道地接神區萃萬

國之梯航普兆民之樂熙來攘往之衆胥慶春臺肩
摩轂擊之倫咸登壽域然而川塗跋涉易興趼足之嗟
風雨晦明難遂棲身之願或徘徊岐路最急資糧或偃
蹇孱軀尤需醫藥於是都人尚義上戶輸金託此三乘
之津梁用濟四生之疾苦慈雲法雨資佛力以醒羣迷
夕咀晨鐘贊王化以弘大澤寒得衣而饑得食羈旅如
歸病有託而療有方疲瘵立起既安全之甚衆且存歿
之皆寧有司以聞深為嘉悅夫好義輕施乃良民之美

行恤災拯患實盛世之休風喜見我民還敦古道咸能
體朕憂民之念推朕救民之心創建雖肇乎都城效法
期及乎寰宇成比戶可封之俗慰一夫不獲之懷書傳
從欲於四方詩詠徧德於百姓此則朕之志也爰賜之
額曰膏澤回春而為之記康熙四十四年五月日

東嶽廟碑文

京師朝陽門外向有東嶽廟自元明迄今歷有年所康
熙三十七年居民不戒而燬於火其明年朕發廣善庫

金鳩工庇材命和碩裕親王董其事不勞一民不興一
役經始於三十九年三月訖工於四十一年六月不三
歲而落成殿閣廊廡視舊加飭焉夫五嶽為名山之長
而泰山尤羣嶽之宗於時為春於德為仁而其神之靈
又能膚寸成雲霖雨天下故諸嶽止祀於其方而泰山
之祠徧宇內崇德報功所從來久矣朕即位以來殫心
治理訪求民隱閱視河工屢經魯地皆命專官致祭凡
以為蒼生祈福祉也茲朝陽既都城之巽位而東嶽廟

又適在其地則因其方位之宜以隆望秩之典亦禮之
可以義起者然則斯廟之成也神既得所憑依而民亦
遂其瞻仰自茲以往風雨以節寒暑以時俾海宇得休
養生息以共樂於豐穰之世庶於朕四十餘年惠愛黎
元之意其稍有慰乎爰書重建之歲月以昭示來茲云
爾康熙歲次甲申冬十一月上旬書

隆興寺碑文

正定府城隆興寺者前臨滹水後睇恒山城郭逶迤林

木縈帶敞高明之淨域標爽塏之琳宮考厥始基肇自
隋代宋開寶時重加創建神光夜燭首出亦山之銅法
雨晨流復下頰龍之木靈異既啟崇宇斯興遂洗香湑
仍裝寶像稽諸紀載良有明徵自是以來七百餘載風
雨推剝日就傾圮朕曩從巡省所過爰命鳩工役不煩
民貨出內府復以專官董領其事經始康熙四十二年
之夏落成四十八年之冬複殿重樓雲日輝映層巒列
棟金碧參差開銃蓋之真容具莊嚴之寶相七十三尺

復還舊觀千萬億身長留勝跡洵十方所瞻仰為萬品所皈依茲寺也密邇神京接連畿輔地當都會時際豐穰烟火於焉殷繁輪蹄之所輻湊莫不齋心肅慮致禮加虔斯亦慈氏之宏規而法門之傑構矣夫旨窮六度首以仁義為宗諦演三乘多證善惡之果宣昭覺路導引迷津亦有裨於人心不無關於世教今茲重新梵宇更續禪燈上為

慈闡祝釐下為兆民祈福營建之意實在於斯寺中榜額凡

十有九皆朕親書復製碑文勒諸貞石俾垂無窮焉

熱河穹覽寺碑文

哈喇河屯者蒙古名色釋之即烏城也乃古興州之轄
因世久事殊前朝未及設官分職皇輿等書遍察難考
朕避暑出塞因土肥水甘泉清峰秀故駐蹕於此未嘗
不飲食倍加精神爽健所以鳩工此地建離宮數十間
茅茨土階不彩不畫但取其容坐避暑之計也日理萬
幾未嘗少輟與宮中無異萬幾偶暇即窮經史性理諸

書臨池揮翰膳後即較射觀德以寓安不忘危之念此其
大略也因有離宮隨侍人員共祝萬壽而建寺不日即
成又求扁額以垂永久朕賜書云穹覽取沈約驤首覽
層穹之意在行宮之巽位寺勢雖微蓮社梵音鈴鐸經
聲巨細皆備內有三大士相仙衣飄颻瑞園涵影以空
寂為本慈悲為教汲引四生津梁三界清鐘夜聞遠近
罔弗皈依月殿朗輝中外靡不瞻仰况右倚層巖左帶
大河口外諸藩來往進貢皆由經過三庚無暑六月生

風地脉宜穀氣清少病誠為佳景前朝以戍邊不暇何
得駐蹕今四海為一八表同風自京北至萬里如同家
人父子豈有他術哉以誠而已矣今臣下歸福於朕朕
曰天下皆福朕之福也先憂後樂朕之職也所願者年
豐歲稔烟塵永息余之念茲在茲之意足矣

重修西頂廣仁宮碑文

天地之大德曰生在四時為春在四德為仁易文言曰
元者善之長也君子體仁足以長人自古帝王茂對育

物四海之大萬民之衆以及昆蟲草木之微各遂其生者無非體天地好生之德以流澤於無窮也易繫辭又言乾大生坤廣生則是生物之功天始之而地更廣之蓋坤者母道也母道主慈其於生物為尤近焉京城西直門外有西頂舊建碧霞元君宮地近西山之麓今西苑之西南所謂萬泉莊者固郊畿一勝境也元君初號天妃宋宣和間始著靈異厥後禦災捍患竒蹟屢彰下迄元明代加封號成弘而後祠觀尤盛郭郭之間五頂

環列西頂其一也歲時既久陳迹都荒碑碣猶存椽栴
弗整其謂安神何歲在戊子發內帑命有司鳩工重葺
之閱一載而落成棟宇穹然垣廡翼然殿寢秩然丹雘
燦然瞻拜其下者虔肅有加焉朕於萬幾之暇亦往展
禮仰祝

聖母之釐俯介生民之祉以祈純嘏以鞏皇圖顏其額曰廣
仁宮羣臣請立石以紀之朕思仁之為道大矣擴之可
放六合約之止在一心先儒論仁謂心如穀種其生之

性即為仁故物物而有仁則生生而不已天地之於人物父母之於子皆是道也朕君臨天下日以養育羣生為念俾穉者得以長壯者得以樂老者得以安期於生齒殷繁兵刑寢息民無天札物無疵癘總以一人推之而有餘今獨於茲廟曰廣仁者蓋以元君之為神有母道焉母道莫大於坤今之廟宮適位坤維元君其佐坤之厚德以廣其仁使首善之區同臻壽域寰寓之內永託慈庥斯神貺與日星共著而禋祀與金石常新矣

石鼓贊 有序

朕釋奠

先師於國學觀石鼓於廟門之兩廡緬懷周宣迄今二千餘年而中興之烈岐陽之蒐俯仰如昨魯壁汲冢闕有間矣此文此石獨煥然與日月爭光是三代法物之僅存者也今列在太學實斯文之盛嘗尋繹榻本推詳其遺義有會於心焉乃為贊曰

猗歟周宣纘緒文武一時從臣方叔召虎蒐於岐陽陳

列斯弩鎬功告成伐石作鼓以歌以銘載規載矩豈備
考擊致煩矇瞽鼓聲思將義蓋有取歷二千年鏢日蝕
土蝻蚪失傳剝落誰補車攻馬同麀鹿虞虞晨星闕月
完白可數天門詆蕩岐山翔舞軒頡是班鍾王敢伍陳
在泮宮設於廊廡是切是磋匪擊匪拊橋門觀禮如對
簋簠庶幾文治再見三古

祈穀壇頌

有序

嘗觀古之明王必嚴於敬天隆於尊祖誠於養人惟

其敬天故饗帝尊祖故崇配養人故重農而上辛祈
穀厥義備焉蓋陰陽順風雨調災沴不生五穀咸熟
斯比戶可風然後寬刑簡賦導以禮樂躋之仁壽苟
陰陽失序風雨不時則五穀傷矣五穀傷而民饑至
矣修粢盛而奏馨聞將何藉焉予肅將禋祀每遇薦
享大典備極誠敬期於孚格蒼穹為羣黎禔福幸海
內穡事浹歲順成即間邁微禋而補助旋施有秋存
至豈非

上天粒我烝民而默佑予一人以無疆之休哉仰戴

帝慈莫可名喻聊摠感忱作為頌曰

皇矣

上帝仁覆萬國靡物弗懷鑒於有德古聖聿修昭事建極元
日殷薦爰祈粒食藐躬受命精意以禋太圻體方郊丘
象園屋而大享典禮均虔外至必主本祖本天巍巍三
聖陟降攸格盡志對越百神其懌曰潔豆籩曰崇珪璧
匪祝一身為民請澤惟

天監觀愛我兆人宜夏而夏宜春而春和風應節甘雨司辰
災螟罔作瑞穗含醇豈止郊畿式暨五服昞昞疆理何
土不淑疑疑黍稷何產不熟造化靳施伊誰能育啟蟄
而耕納稼而場于耜于趾我倉我箱詎曰農夫實予之
慶上下交裕藉此豐穰民則不知予敢忘

賜湛恩汪濊頌思奚匱歲歲吉蠲竭誠肆類庶其眷之永錫
樂利

刈麥記

塞外地寒最宜禾黍邇來中外一家版圖萬里朕避暑山莊歷年已多今百穀齊成與內地相似不過遲十數日而已故種麥者頗蕃山莊苑內麥穀黍稻皆寓焉從來稼穡之艱不可不知亦不可虛設朕念切民依痼瘵一體年近七旬精力漸衰扶杖而閱耕種臨畦而觀刈穫遇雨暘時若則收割之際蒼顏野老共慶有秋黃口稚子無愁乏食此朕一時之真樂也五十四年夏六月小暑乃苑中刈麥之候薦新觀成如雲表盛晨氣暖風

秀蘄標竒遠聞各省麥秋相同此目前之實景也孔子云吾不如老農老圃孟子云從其大體為大人從其小體為小人農夫足食則樂天下至廣兆民至衆天時之不齊地脉之不一吾之樂民有食也以目前之實景而且不能必其盡同又如此嗚呼豈如田野村夫憂樂止繫於身家而計慮不及於遠大乎故心之勞逸不可同日而語也夫

顯應寺碑記

都城之西有佛舍一區創自前明中葉雖歷加修葺而
歲月寢久復燬於火舊觀既替香界就荒非所以崇象
教廣禪悅也朕以古刹勝因宜規整飭爰發帑金鳩材
董役經始於康熙五十年十二月落成於五十八年正
月不庠不侈棟宇一新答士庶敬信之忱慰緇衲皈依
之願用錫嘉名顏為顯應蓋以慧炬祥光無微不顯慈
雲法力有感必通澤萬品於真源耀十空於寶智同圓
妙果長稔福田云爾

髻髻山玉皇閣碑記

距京師百里有山曰髻髻隸懷柔縣兩峯高矗望之如
髻故得是名自元明以來號為近畿福地因上有碧霞
元君之祠是以每歲孟夏四方之民會此祈禱者駢肩
疊跡不可勝計古稱積高之區神明所舍况茲山北倚
紫塞南拱神京岡巒迴合蜿蜒磅礴而鍾秀於是則其
神氣之感數有靈應理固然也康熙五十二年值朕六
旬誕期諸臣民就茲山瞻禮為朕祝禧因共建玉皇閣

以祈延壽經始於癸巳三月十八日落成於甲午三月十八日而請記其事朕御極五十餘年夙夜孜孜惟體上帝仁愛斯民之心以撫綏天下幸四海清晏年穀順成朕與天下臣民得同享太平之福者皆

上帝之眷佑也朕之祇承於

上帝者惟在天下臣民之永安而天下臣民之祝願於

上帝者惟在朕躬之永年然則茲閣之建即

上帝之陟降監觀於是乎在矣爰立貞珉載其始末以傳永

久云

湯山龍尊王佛廟碑記

塞外山脈自西北來至熱河岡巒迴合形勢鬱盤環左右百里間多名泉而山莊之東北有湯山其泉湧出山腰自然而溫浴之蠲煩除疴導和怡性朕始經其地謂水候微涼更得暄煖乃宜於體比再往則加燠矣記稱邱陵川谷能出雲為風雨者皆有神况是山蘊金沙之氣蒸為醴液又應候如意豈非有神靈默相者歟爰於

泉上繚以周垣構行宮數椽為避暑沐浴之所而於其中建龍尊王佛廟以奉香火焉考湯泉著於史傳者驪山天都最為名蹟其他亦散見於山經雜志而此地自古未入版圖故川原之勝蔽翳於荆榛沙磧間幸今中外一家茲泉始得呈其靈異古人謂地脈之興亦有待而然非虛語也夫君子澡身浴德如沃盥以去垢朕於此竊附湯盥之警期與天下日新而所以膏澤吾民以及蒙古諸部落使咸壽考康寧者則不能無望於佛之

庇佑焉是為記

香岫寺碑記

京師近郊峯巒林壑之勝無踰西山歷世以來琳宮梵宇在崖谷間者星羅碁布永豐屯則距山數里舊有奉佛處曰彌勒院連山環拱蒼翠萬狀烟林相錯阜壤聯綿兼以輪蹄罕至清曠無塵洵自然之福地也院以歲久日圯近始拓而新之更名曰香岫寺凡佛堂經室賓序僧寮莫不備具宏傑壯麗屹然為近山巨剎曠覽遐

矚左右映帶登臨勝槩殊加於舊寺乃宮庭為朕祝禧
所建朕臨幸天下五十餘年幸方內乂安時和年豐兆
民樂業

上天錫福莫大於此朕以天下為一家四海為一人所願親
踈遐邇無不獲康寧壽耆之慶此朕之夙志也庶幾為
諸神靈之所鑒歟因勒辭於石以識其始云

資福院碑文

辛丑春澤卜尊丹巴胡土克圖諸蒙古汗王貝勒貝子

公台吉他布囊等赴闕稽首合辭奏言皇帝慕承鴻業
六十餘年天地清寧海宇安泰邊塞遠人飲和禔福為
日久矣往者噶爾旦恃強侵軼皇帝親總六軍盪除狡
寇安集散亡龍沙瀚海百十部落普蔭大慈安土樂業
垂三十載策妄阿喇布坦克孽之餘肆其頑悖欲滅法
教皇帝討臯抹災命帥受算深入曠古絕域斬俘逐北
遂恢故宇振法輪青海以南三危以北百蕃之長悉心
向化欣睹天日臣等伏思皇帝神功巍煥景祚緜遠亘

金史卷之六十一
卷八
古未覲凡有知識咸思仰報况臣等沐累朝祿賜受皇
帝高厚踴躍烏能自己乞於京師鼎建梵刹申頌無疆
且以木石磚甃之餘於安定門外立十方院為飯僧所
徒衆自遠至者得有棲止朕以建寺煩費詔諭止之而
允其立院之請諸汗王等復奏言禁城西之崇國寺故
西僧香火也今願新之為皇帝祝釐地朕以其誠懇亦
俞允之夏五月十方院建修功先竣諸汗王等請院額
朕賜名曰資福蓋嘉諸蒙古平日服事之勤而取釋氏

廣資福緣之諦也書曰而康而色曰予攸好德汝則錫之福傳曰見於外而有安和之色發於中而有好德之言則錫之以福也諸蒙古貞一乃心恪奉藩職協和鄰部輯睦姻親天必迎其善意而降之以吉祥將見戶口愈滋畜牧益盛朕樂與共太平有永而勿替也是為記

溥仁寺碑文

蓋聞徧覆含弘者造化無私之體民胞物與者大君宗子之心古帝王繼天運世保合太和凡日月照臨聲教

暨訖必使咸躋壽考各遂生成納八紘於雨露之中載
殊方於衽席之上深仁怙冒至化洽周斯大同之極規
寶無我之洪願也朕誕膺鴻歷五十餘載布信推誠遐
邇一體藩臣部長悉我屏翰絕幕荒陬皆吾黎庶故神
倉玉粒常給以餼糧天駟月題每貸之收種休息長育
匡翼勞來宵旰彌勤終始無怠朕惟期漸恩敷德俾皆
樂我太平諸藩亦嚮化傾心靡不謹爾侯度雨風時若
生齒日蕃水草茂滋產畜殷碩邊籬甌脫永息侵陵漸

海龍沙羣資樂利綏安撫輯數十年養之教之膏沐涵
濡至今日庶矣富矣乃者朕六十誕辰衆蒙古王台吉
等咸詣闕廷奉行朝賀不謀同辭具疏陳懇願建刹宇
為朕祝釐朕鑒其悃誠重違所請念熱河之地為中外
之交朕駐蹕清暑歲以為常而諸藩來覲瞻禮亦便因
指行宮之良隅特許營度為佛寺陶甃於冶取材於山
工用無輸輓之勞金錢無踰侈之費經始訖功告成不
日琉璃梵殿同白馬之莊嚴瓔珞祥雲儼龍華之色相

金峯聳翠靈鷲飛來暖溜蒸砂寶池分出林成福德橋
木千章界是伽耶香園十頃固天開選佛之場地蘊清
涼之境也朕歷觀往史溯前朝版籍有區幅員未廣
茲熱河之輿壤迺紫塞之神臯名號不掌於職方形勢
無聞於地志朕以渺躬撫有四海邊孺之外悉為畿甸
諸藩於此建寺介福率先恐後無小無大罔不來同朕
用自慰更用自惕焉書不云乎一人有慶兆民賴之釋
典亦云若彼大雲蔭注世界博稽旁考鑒於朕衷觀我

觀民思惟此理特賜寺額曰溥仁將欲汪濊之澤均霑於率土升恒之慶廣洽於普天藉諸藩祝上之忠誠為萬方祈純嘏之錫以佛氏施仁之因果共諸藩保鞏固之休爰紀斯文勒諸貞石

雜著

白粟米

粟米

本草粟米即小米

有黃白二種黃者有粘有不粘本草注

云粟粘者為秫北人謂為黃米是也惟白粟則性皆不

粘七年前烏喇地方樹孔中忽生粟一科土人以其子播獲生生不已遂盈畝頃味既甘美性復柔和有以此粟米獻者朕命布植於山莊之內莖幹葉穗較他種倍大熟亦先時作為糕餌潔白如糯稻而細膩香滑殆過之想上古之各種嘉穀或先無而後有者槩如此可補農書所未有也

山海關

山海關澄海樓舊所謂關城堡也直峙海許城根皆以

鐵釜為基過其下者覆釜歷歷在目不知其幾千萬也
京口之鐵甕城徒虛語耳考之志冊僅載關城為明洪
武年所建而基址未詳築于何時蓋城臨海衝濤水激
射非木石所能久固昔人巧出此想較之鎔鐵屑炭更
為奇矣

九河故道

九河故道漢唐宋諸家之說不一或謂在濟南境內或
謂遠界永平而酈道元謂九河苞淪於海以朕揆之其

九河入海之處在今天津之直沽而九河故道不出滄景二三百里間也蓋水性就下今南北之水以天津為尾閭地最窪下雖數千百年中或陵谷變遷而其高卑大勢南北定位有必不可易者即以禹貢之文考之可以斷矣禹貢曰至於大伾北過泲水至於大陸又北播為九河疏云大伾屬魏郡黎陽泲水在信都大陸澤名夫黎陽今之濬縣信都今之深州大陸澤在今之東鹿界而河間在濬縣深州東鹿之北故曰又北也又九河

既道疏云平原以北平原今德州境言德州以上也漢書溝洫志許商云九河之名有徒駭胡蘇鬲津在成平東光鬲界中此三地今皆屬河間杜氏通典云鈎盤在景馬頰覆釜在趙郡景即景州趙郡今涿易南古所謂燕南趙北也輿地記云簡河在臨津金史地理志云南皮縣有潔河太史河傳志所載九河故道之在河間境也又豈不彰明備著乎則天津為同為逆河入海之道無疑矣河自周定王時已南徙九河故跡亦漸湮廢後

人不能深究地勢多穿鑿傳會其指在濟南者既失之過南其指在永平者又失之過北而鄭康成據緯書謂齊桓公填塞八河以拓疆界其說益滋譌謬耳凡人讀書能正據經文考以古今形勢則諸家之說自有折衷夫河間古郡稱名已久其所以謂之河間者以其在九河之間也顧名思義又可知矣

御稻米

豐澤園中有水田數區布玉田穀種歲至九月始刈穫

登場一日循行阡陌時方六月下旬穀穗方穎忽見一
科高出衆稻之上實已堅好因收藏其種待來年驗其
成熟之早否明歲六月時此種果先熟從此生生不已
歲取千百四十餘年以來內膳所進皆此米也其米色
微紅而粒長氣香而味腴以其生自苑田故名御稻米
一歲兩種亦能成兩熟口外種稻至白露以後數天不
能成熟惟此種可以白露前收割故山莊稻田所收每
歲避暑用之尚有贏餘曾頒給其種與江浙督撫織造

金史卷之五
令民間種之聞兩省頗有此米惜未廣也南方氣暖其
熟必早於北地當夏秋之交麥禾不接得此早稻利民
非小若更一歲兩種則畝有倍石之收將來蓋藏漸可
充實矣昔宋仁宗聞占城有早熟稻遣使由福建而往
以珍物易其禾種給江淮兩浙即今南方所謂黑穀米
也粒細而性硬又結實甚稀故種者絕少今御稻不待
遠求生於禁苑與古之雀銜天雨者無異朕每飯時嘗
願與天下羣黎共此嘉穀也

畿輔通志卷八

欽定四庫全書

史部

畿輔通志卷十九

詳校官監察御史臣劉人睿

檢討臣德生覆勘

總校官進士臣繆琪

校對官庶吉士臣吳裕德

謄錄監生臣何茹連

欽定四庫全書

畿輔通志卷九

宸章

聖祖仁皇帝

白洋湖

遙看白洋水帆開遠樹叢
流平波不動翠色滿湖中

水村

孤村綠塘水曠野起春雲
槐柳勝南苑青莎有鷺羣

鄭州河道

藻密行舟澀灣多轉楫頻帆懸風正處烟火近通津

龍潭途中作

駿馬駸駸蹋綠蘋羽旗豹尾映龍鱗暑中荷鍤方知苦
停輦觀苗問稼人

黑龍潭

暗通山下草流出澗邊花空潭深靜處灑翰動龍蛇

由廣泉寺至卧佛寺

巖邊青竹低臨水雲外嵐峯半入天僧舍無人常寂寂
山門洄繞是寒泉

詠卧佛寺古樹

喬木婆娑陰正肥夕陽相對嶺崔巍薰風拂樹涼雲起
暮景蒼然送輦歸

駐蹕碧雲寺

山寺通幽境鶯啼綠樹枝旛虹迎玉輦剎鳳駐雲旗翠
麓三乘闢佳辰萬騎宜松陰輝落景遊豫近臣知

碧雲寺臨泉望月

碧雲夜望月初圓
星斗輝煌照九天
滴滴涓涓無止息
此心常使若清泉

碧雲曉起

山中曉起聽蟬鳴
遙對峯岑霽色清
洞壑有年奇樹老
夢回疑是在蓬瀛

再賦碧雲曉景

夏早日方長
南風草木香
清涼飄御扇
荒刹得恩光

洪光寺盤道

白雲飛夏日斜徑盡崎嶇仙阜崇高異神州覽眺殊

來青軒臨眺二首

搖拂烟雲動翠旗登臨翰墨每相隨山河景象無窮意
俯瞰人情因物知

其二

來青高敞眺神京斜倚名山澗水清此日君臣同覽賞
村柯雞犬靜無聲

法海寺瞻

皇考御書敬佛二字

重來瞻御筆懷感動心神丕烈邁前代鴻休啟後人興
文盛禮樂偃武息兵民法則光華遠千年照佛輪

坐法海寺偶吟

縱目西山宜永日開襟五月似高秋萬幾偶暇因遊豫
期與黎民樂未休

賜聖感寺僧海岫

修然老衲淨塵緣
臺殿參差起瑞烟
馴鷓鴣簷前應受戒
遊鱗花下亦參禪

駐蹕石景山

駐蹕荒亭日欲斜
潺湲石溜滴雲霞
鸞旗飄動連香草
龍騎驂驪映野花
巖洞幽深無鳥跡
峰崖高處有人家
青山綠水誰能識
懷古登臨翫物華

石景山東望

車書混一業無窮
井邑山川今古同
地鎮峻嶒標異秀

鳳城遙在白雲中

潭柘寺偶作

怡神水樹清襟洽
滿目奇峰入夏雲
微起涼風響萬籟
山中鶯囀奏紛紜

詠潭柘寺竹

翠葉纔抽碧玉枝
經旬清影上階墀
凌霜抱節無人見
終日虛心與鳳期

石景山望渾河

石景遙連漢渾河似帶流滄波日滾滾浩淼接皇州

南苑元靈宮是

世祖皇考建

傑閣橫霄峻清都與漢翔規模開壯麗星宿燦輝光碧
瓦浮空翠金鋪映日黃門當啼鳥靜戶有異花香細草
沿階發新槐拂檻涼紆迴疎輦路藻彩繪雕梁警蹕臨
仙境瞻依問谷王敬欽崇太昊繼述憶

先皇歲月碑文古乾坤事業昌茫茫扶大造皞皞體穹蒼恭

已身無倦齋心念不忘時巡非逸豫幾暇豈遊荒衛騎
驂驪列華旄宛轉颺南薰披萬物北斗起千祥瑞氣庭
前見佳辰晝正長休歌白雲曲吾道在惟康

德壽寺

持身崇孝理清淨契真如歲久開金寺時來降玉輿

沙河途中作

輝煌明輦道將曉漏聲殘秋月西山落金風北野寒望
陵悲樹色就景盼雲端每念芳華日溥溥露未乾

清河荒亭

楸葉晚蟬鳴荒亭蟋蟀聲露凝新樹色日出滿林明
蝶從枝舞蜻蜒點水輕欲看秋景好歸路且徐行

海子北紅門秋雨後行圍戲作

晝漏稀聞紫陌長霏霏細雨過南莊雲飛御苑秋花濕
風到紅門野草香玉輦遙臨平甸濶羽旗近傍遠林揚
初晴少頃布圍獵好趁清涼躍驕驩

瞭鷹臺

清晨漫上晾鷹臺八駿齊登萬馬催
遙望九重雲霧裏羣臣就景獻詩來

南苑閱馬

渥洼龍種雪霜同毛骨天生氣格雄
八駿齊觀南苑裏豈誇當日玉花驄

駐蹕平家灘

鑿輿駐蹕近滄浪行殿崔嵬對夕陽
郊外村莊時極目秋成處處有風光

駐蹕薊州城南遠眺山村

萬騎驂驪擁薊城風行雷出遠天清微霜細草野狐懼
寒露荒烟山鳥鳴捲幔浮涼侵帳殿倚牀明月似都京

欣隨

聖母遊情曠深夜還思勉悃誠

雨後經明總兵戚繼光所作八角石亭

華清雨後問安回徐步山椒到水隈秋木荒池今白草
寒花故壘舊青苔精靈銷散人何處功業留傳志未灰

為將當年堪拊髀亭開八角尚崔嵬

清晨入盤山二首

日出入盤山宸遊草木間村莊人盡望處處水潺潺

其二

當年乘輦到今日復來遊山水不同色泉聲還細流

古中盤望蓮花峰

中盤遙望蓮花峰日映山林氣色重老衲吟詩渾半偈

翠輿臨發又從容

盤山絕頂三首

上盤絕頂俯神京九月登山積翠晴荒寺日高人少至
野林烟靜鳥無聲道中勒馬觀風景澗下留鑿愛水清
縱目徘徊猶不盡氤氲縹緲海雲輕

其二

四顧清標高逼天風雲塞上斂寒烟遙觀沙漠宣威遠
近控州城作鎮懸紫蓋山中獨竒秀雙峰嶺外更綿聯
九秋朗耀幾千里落葉蕭條滿目前

其三

薄暮東峰來返照遊心怡曠動揮毫題詩數句林光晚
作賦初聯雁陣高盤道峻增難步躡危巖截窠恐身勞
欲歸帳殿還傳語引路山僧度遠舉

晚過李靖菴二首

兩崖石壁出秋雲野草寒林有鹿羣古剎斜陽人寂寂
香烟飄處雜紛紜

其二

蒼茫絕頂樹參差
落日還營過竹籬
念及凌烟留姓氏
獨於古壁一題詩

由鮎魚池出關咏瀑布水

巉巖瀑布挂前川
樹冷烟寒幕碧天
關外黎民風俗厚
涵濡威德已多年

登景忠山

景忠遠上日方闌
巖壑層層生早寒
嶺腹凍雲凝玉仗
山中瑞氣接仙鑿
鳴鐘澗裏經聲近
擊鼓樓前樹影殘

繚繞旌旗縈石道六龍行處萬民觀

灤河

寒邊遠繞至灤河徹底清明不見波駐蹕徘徊千萬里
石鯨兩岸影嵯峨

溫泉行

溫泉泉水沸且清仙源遙自丹砂生沐日浴月泛靈液
微波細浪流琮琤初經石竇漾暄溜烈勢直與炎曦爭
灤洄碧澗落花駐掩映翠巘霜林明汀迴溪轉入欄檻

甃以文石何澄泓方壺圓嶠時自暖紫芝朱草冬常榮
殿啟披香溢石體盤低承露浮金莖沖融太和蓄元氣
炎德利物功難名氤氲沆瀣結紫霧縹緲雲霞連赤城
高秋九月天颯爽鸞旂鳳節紛相迎

慈寧瑤輦度閭闔絳霄帳殿開蓬瀛神泉淑景供遊賞流金
漱玉堪怡情時巡豈必瑤圃遠對此心意皆和平華清
繡嶺杳寂寞鯨魚鳧雁徒縱橫曷若茲泉獨標異萬年
勝蹟環神京歲時來往護仙蹕點筆為賦溫泉行

溫泉流杯戲作

曉霜早落滿池清
一氣涓涓愜勝情
偶坐浮杯幾暇日
君臣對景論平生

南苑橋上大風

南苑霜華點翠旗
嚴風臘月斷流澌
已知朔氣催寒盡
橋跨長虹湧溜池

景山積雪侍衛下趨如飛

憑高縱遠覽積雪
明山峰直下數千尺
飛騰跨玉龍

清明登玉泉山

寒食登高芳草青
泉聲映柳出春亭
心中懷得天然處
坐對沙鷗樂野汀

時巡近郊憫農事有作

芳郊景物麗淑氣扇暮春
靈雨應良節光風薄佳辰
省耕已屆候夙駕方來巡
前驅列式道羽衛羅鈞
陳時有田間子荷耒披車
塵譏訶勿頻數疾苦當咨
詢千耦幸終畝二脯猶懸
困穉褻爾勤動痼瘵予隱
親調賜出泉

府拊循屬官臣行潦有挹器列井無枯津所惠良未徧
嗛嗛愧斯人

鄭州雜詩五首

條風鼓櫂動清漪夾岸青青楊柳垂輕轉牙檣觀易水
波光日影映旌旗

其二

桃花歷落李花開綠柳含烟傍水隈鴻雁平沙看不盡
春光曖曖入蓬萊

其三

為省春耕歷灞澗鑿與頻止
勸農功柴門掩處烟村靜
碧水長橋落彩虹

其四

陽氣溫和臨樹久花繁物靜
草芊芊莎添嫩色含波綠
柳覆金隄翠幕連

其五

野水瀾漫處處長方流涵玉
動珠光風移藻荇波痕濶

千點鷺鳧柳一行

夏旱步禱

南郊喜雨

歷春憫農勞首夏望嘉穀離畢月故遲密雲走何速
颯穹閔膏澤及此祈年夙齋居承穆清中夜起自肅繁星
麗赤霄雲漢光自煜雞鳴開重闥輿馬輟華轂步禱升
郊壇祠官啟太祝是時甘澍零霑潤及拜伏空濛迫閭闔噴
薄驅海瀆屏翳灑道迴滲漉足裳服麥隴應秀色重穎

欲在目願惟歌屢豐餘粟棲比屋

景山春望

雲霄千尺倚丹邱輦下山河一望收
鳳翥中天連紫闕
龍蟠北極壯皇州
烟生沆瀣春初麗
露濕芙蓉翠欲流
却向閭閻看蔀屋
崇高還廛廟堂憂

秋日出郊觀稼

秋氣日寥迴萬象
背蒼蒼朝暎被溼露
草木含晶光
西成方屆候農事
將築場於焉省斂
獲令典重百王
輕軒

屏前置鳳駕無嚴裝郊原一以眺烟樹紛成行微風散
林樾清流抱迴塘土脉秀且沃篝車鬱相望新鎌粲如
月刈此溪雲黃捃拾復何幸遺秉滿道旁烏雀互翔集
婦子咸悅康行將吹葦籥報爾千斯箱眷言三時勤艱
難詎可忘茫茫視九壤豈盡歌豐穰二鬴苟不充予饑
怒如傷幸茲樂有年時若雨與暘勗哉慎所麗田功庶
無荒

遠望西山積雪

積雪西山秀仙峰玉樹林凍雲添暮色寒日淡遥岑

賜大學士杜立德旋里

十載資賢佐勞深致太平訐謨留紫闥風度重丹楹方
倚鹽梅畧難違邱壑情餐芝黃綺伴軒冕有餘清

賜直隸巡撫于成龍

并序

直隸巡撫于成龍秉性惇樸廉介夙聞朕心嘉賴俾
典節鉞保釐畿輔惟能激濁揚清始終如一清潔之
操白首彌厲真國家之可重人所不能也茲來陛見

爰賜以詩用示敦勵之義且以風有位焉

自昔崇廉治勤思吏道澄郊圻王化始鎖鑰重臣膺政
蹟聞留犢風期素飲冰勗哉貞晚節褒命日欽承

潞河三首

潏灩春波散碧漪白蘋初葉麥初岐潞河三月桃花水
正是乘舟薦鮒時

其二

畫鷁中流起櫂歌參差荇藻漾晴波澤梁雖設曾無禁

斜日魚罾兩岸多

其三

東風吹雨曉來晴
春水高低五牖聲
蘭漿乍移明鏡裏
綠楊深處坐聞鶯

巡幸出喜峰口過黃土巖

紫塞雙崖出丹梯
百尺懸草香遮細路
樹老卧晴烟地
為時巡到山當隘
口偏何年留石室
駐馬望層巔

大石磯

遠近峰迴合潺湲澗淺深一磯橫大石萬騎出層林蒙
密巖花發綿蠻谷鳥音龍堆塵不到憑眺足娛心

入喜峰口

一道鳴鑿度三驅振旅還莓苔天半石松枯雨中山險
設關門壯時清埃火閒

孝陵佳氣近縹緲翠微間

夏日潭柘寺

微雲綴岡嶺細路揚前旌磴轉松門開漸覺沙界平潭

湮石甃露柘古苔紋生一徑得疎豁層軒面崢嶸愛此
戶外泉俯視涓涓清修篁挺蒼翠其下流交橫斐然淇
澳思宛爾渭濱情岨谷有遺響簫韶鸞鳳聲

瀛臺

紅闌橋轉白蘋灣疊石參差積翠間畫舸分流簾下水
秋花倒影鏡中山風微瑤島歸雲近日落清霄舞鶴還
乘興欲成蘭沼詠偶從機務得餘閒

天津

轉粟排千艦分流納九河潮聲連海壯樹色入京多鼓
楫魚龍伏停帆鶴鶴過津門秋望遠明月湧金波

通惠河閱運艘

千檣爭溯白蘋風飛輓東南澤國同已見靈長資水德
也應辛苦念田功

東巡二首

并序

八年征勦喜見澄平緬想

祖宗功德禮宜恭謁

陵廟以告成功爰於二月十五日命駕東巡是日天氣晴和
微風動旆從者溢路觀者夾途顧瞻遠邇莫不歡躍

賦詩二首

昆池不習戰寰宇已銷兵鴻業承匪易膚功久乃成威
靈昭

祖德展謁慰羣情迢遞關山路寧辭千里行

其二

順動因時豫東風引翠旗鳴鑿萬騎出執事百僚隨日

暖草初茁烟輕柳未絲春光無限好應有上陵詩

玉田

徐無山下水涓涓幾道橫流灌玉田驅犢荷鋤農事作
五風十雨卜豐年

駐蹕豐潤城西

旌門鏡吹發雲璈行漏聲傳帳殿高欲向山頭望明月

豐潤縣有明月山恐驚霄漢避龍鑣

夷齊廟 并序

永平府治西古孤竹城夷齊廟在焉灤水經其前清
風臺峙其後倚巖俯流足以登眺夫夷齊孤竹君之
二子也能讓侯封不食周粟採薇首陽山獨行其志
孟子以聖之清稱之蓋人惟能立節自可垂名夷齊
之去國潔身不求人知而廟貌千古迄今猶存吁造
詣其可忽乎哉

灤河水清駛荒山屹然峙上有孤竹城亂石半傾圮堂
廡既具觀廟貌亦儼爾緬懷商代末天下漸披靡茲地

實藩封人民差可恃兄弟以義讓富貴如敝屣叩馬諫
周王數語昭青史遯跡首陽山薇蕨何其美萬載挹高
風頑懦聞之起蒼蒼臺下松湯湯臺前水勁節與澄流
不愧相比擬停鑿碧山阿懷古未能已

灤河泛舟

平沙漠漠接長河天際浮雲落照多兩岸蒼山相竦峙
扁舟一櫂任清波

經水平城南

三代幽偏地秦時右北平山川綿大陸形勝借堅城晴
日初迎輦春風暗拂旌龍山遙入目縹緲白雲橫

撫寧

輦路平鋪孤嶼東日華升處海雲紅忽聽百舌春啼巧
盡在蒼條古木中

山海關

并序

連山據海地固金湯明時倚為險要設重鎮以守之
我朝定鼎燕京垂四十年關門不閉既非設險還慙

恃德偶賦數言聊以記事

重關稱第一扼險倚雄邊地勢長城接天空滄海連成
歌終歲苦插羽不時傳作鎮隆三輔征輸困百年笳寒
龍塞月甲冷雉樓烟歷數歸皇極綱維秉化權漫勞嚴
鎖鑰空自結山川在德誠非易臨風更慨然

蒙恬所築長城

萬里經營到海涯紛紛調發逐浮誇當時用盡生民力
天下何曾屬爾家

姜女祠

朝朝海上望夫還，留得荒祠半佞山。
多少征人埋白骨，獨將大節說紅顏。

西山駐蹕夜聞秋聲

西風吹長林木葉響，如雨起視山月高。
浮雲無一縷

玉泉山晚景用唐太宗秋日韻

晴霞收遠岫，宿鳥赴高林。
石激泉鳴玉，波迴月湧金。
薰鑪籠竹翠，行漏出松陰。
坐愛秋光好，翛然靜此心。

九日幸景山登高

秋色淨樓臺登高紫禁隈
千門鴻雁度萬井霽烟開
翠拂鑿輿上雲隨豹尾來
佳辰欣宴賞滿泛菊花杯

再遊盤山

薊州城北黃崖前水甘土厚多平阡
崇山特起轟霄漢
枯栢夾路陰參天回巒複嶂倍娟秀
幽林邃谷時螢緣
雲藏古寺行未到樹杪先有鐘聲傳
數峰突兀勢陡絕
上迫箕尾雙星躔
峩峩石狀獸蹲立
因風搖曳如空懸

深潭清冷那可測知是百尺神龍淵鉢泉恍惚有海眼
潮井呼噏通百川不然泛濫亦易挹何為萬古清涓涓
神工融結天巧鑿更騁遠目窮高巔漁陽古郡最阻阨
屹為左輔雄幽燕即今交河遠置堠此實堂奧非臨邊
太平粗喜有端緒石根砂磧皆原田偶茲登陟聊駐旆
用寄襟抱題斯篇

黃金臺懷古

昭王禮賢士築館黃金臺矯矯昌國君奮袂起塵埃下

齊七十城聲振滄海隈
汶篁植薊邱豈曰非雄才遺跡
雖榛蕪千載猶低徊
市駿固有術貴在先龍媒
但得一士賢可以收羣材

娑羅樹歌

娑羅珍木不易得此樹惟應月中植
想見初從西域移
山中有人多未識
海桐結蕊松枯形
千花散盡七葉青
山禽迴翔不敢集
虛堂落子風泠泠
楚州遺碑今已偃
峩眉雪外雙林遠
未若茲山近可遊
靈根終古盤層巘

繁陰亭午轉團圍
回睇精藍路幾盤
憑教紫府仙山樹
寫入披香殿裏看

趙北口

趙北時巡至燕南
古戍聞人烟生曉市
橋影漾晴雲浴
鳥迎船出垂楊隔
浦分中流清賞洽
簫鼓陋橫汾

水淀雜詩四首

輕舟十里五里垂
柳千絲萬絲忽聽
農歌起處滿村紅
杏開時

其二

春水船行天上冷風雨過田家深樹幾聲布穀晚晴千
縷明霞

其三

銜泥雙燕沙際暎雨單鳩樹頭昨夜桃花新水鯉魚躍
入蘭舟

其四

為愛沙明水遠更看柳驪花新草木禽魚咸若河山民

物同春

南苑

十里郊南路紅門啟上林歲時蒐狩禮畎畝豫遊心羽
仗連花影帷宮接柳陰鳳城回首望縹緲五雲深

初夏玉泉山二首

別館依丹麓疎簾映碧莎泉聲當檻出花氣入垣多路
轉溪橋接舟沿石竇過薰風能阜物藻景已清和

其二

山翠引鳴鑣湖光漾畫橈野雲低隔寺沙柳暗藏橋百
轉黃鸝近雙飛白鷺遙今年農事早時雨足新苗

石盤峪龍潭

谷轉盤千騎潭深靜一泓魚迎斜照出禽雜野風鳴捫
石苔偏滑分流水益清悠然愜心賞歸路月華生

白水

亂峰迴合古檀州白水雲根一道流誰信塞垣圖畫似
涼風斜日放漁舟

古北口

斷山踰古北石壁開峻遠形勝固難憑在德不在險

曉發古北口望霧靈山

流吹凌晨發長旃出塞分遠峰猶見月古木半籠雲地
迴疎人跡山迴簇馬羣觀風當夏景澗草自含薰

黃草川

烟沙一片塞天圍舊說秋高苜蓿肥今日邊屯皆樂土
茅檐松火接金微

回鑾抵古北口

黃谷清河古戍間鑾車此日省方還長林曲抱千溪水
小徑斜通萬仞山地扼襟喉趨朔漠天留鎖鑰枕雄關
時平不用誇形勝雲物秋澄斥候閒

秋日再過阜平

春經阜平縣夾道多榛杞雉堞久傾頽郭郭僅遺址耆
老遮馬前其言質且俚土硯願力田三時事耘耔所苦
井稅輸道遠越山水聞之切痼瘵寧爾在幹止有司近

拊循瘡痍庶能起十室忠信存何況境百里郊圻戒申
畫風土亦洵美問俗此重來居民咸色喜易彼蒿與萊
荒塗漸成市經野得良圖可以喻治理

再駐龍泉關

高臨晴雨外絕磴似凌空節物經冬異關山對月同龍
泉冰未白雁塞葉初紅歷歷曾遊地香臺在眼中

玉泉春曉

郊墅初晴後芳春曙色旋孤巒堆畫障細穴吐新泉浪

靜鮮鱗躍風恬紫酌妍怡情看萬象浩浩思無邊

觀苗無意到潭柘詠時景

晝永薰風至清泉泱泱長芳年添景色遲日換流光
舊竹隨隄發新花滿澗香觀苗不覺晚微雨點衣裳

瀛臺

歲序開炎節離宮繞翠微蓮香聞講席柳色映垂衣物
阜風光好時清奏牘稀罷朝鷓鴣散花下珮聲歸

河間即古瀛州地

新霜來朔氣納稼滿西疇省斂因農暇觀風廓遠猷箕
躔分冀野輿地古瀛州駐蹕郊垞外斜陽下堞樓

景州觀開福寺塔

湧塔高凌漢穹隆拱法筵虛鈴含遠籟密宇繞寒烟不
問三車法空勞七寶懸偶過成小憇漫比布金田

晚到河間

太皇太后使人送乳餅食物

綵旂晚駐瀛州道忽報銅龍騎使來心識

慈懷同日照口傳

溫語逐陽回松脂似截盤中玉綺食初和鼎內梅兩月幾虛
甘旨奉歸程欲聽曉鐘催

原任總督于成龍居官清廉自古罕有特命諸臣
議卹以勵官方

服官敦廉隅抗志貴孤潔敷歷著賢聲誰能茹荼檠况
復擁旌麾藜藿甘以悅視彼懸魚操於今尤峻烈東南
失保釐言念心如結江上見甘棠遺愛與人說卹典宜

優崇庶不負清節匪獨彰國常且以風在列

薊城遇雪

凍雲封樹薊城西玉蕊輕盈亂馬蹄憶想年年常過此
何曾瑞雪遍山谿

復遊盤山絕頂

絕頂巉巖裏松烟向曉開片雲生衆壑虛籟落空臺寺
古行人少林深鳥亂回千峰多秀色遠眺足徘徊

暢春苑衆花盛開最為可觀惟綠牡丹清雅迴常

世所罕有賦七言絕以記之

碧蕊青霞壓衆芳
檀心逐朶韞真香
花殘又是一年事
莫遣春光放日長

暮秋重出居庸關

亂榆叢柳未經霜
峻嶺崇巖曉色蒼
峽裏細泉流不竭
仍聞太古韻鏗鏘

登雞鳴山

鳥道盤空近塞垣
羊河如帶繞山根
停鑾欲覽沿邊勢

石上藤蘿手自捫

再度居庸關

草木未甲坼年光屬早春
三番勞遠馭一舉本勤民
峽暖泉聲動風和鳥噪新
會看歌凱入景物盡還淳

入居庸關

始和羽騎出重關
風動南薰整旆還
凱奏捷書傳朔塞
歡聲喜氣滿人寰
懸崖壁立垣墉固
苦峽泉流晝夜閒
須識成城惟衆志
稱雄不獨峙羣山

過密雲作

秋風驅殘暑青林墮葉稀
馬嘶涼籟動蟬噪夕陽微
河繞遙通塞山迴盡拱畿
黍苗膏雨足歲事念民依

出古北口

年年秋猶此經過峭石天成險
隘多沙漠名王皆屬國
但留形勝壯山河

入山海關

長城盡處海山竒
守險無勞百萬師
寰宇蒼生歸歷數

當年指顧定鴻基

永平駐蹕

颯颯風聲響畫旗
灤河東岸獵歸時
廟堂幾務親裁決
非是行帷寐獨遲

豐潤即事

去日披金露歸時
動朔吹農家收穫罷
就日向朝曦
出畿東觀秋成

陰霖連六月宵旰念民生
微風收潦水過雨見秋成
古

金史紀事本末卷之二十一
卷九
北龍旗近漁陽鳳輦行戍樓烽火息險豈藉長城

潞河發舟

青翰舟迎旭日升官河放溜始開冰
巡行每為求民瘼
寧避春寒曉霧凝

天津

河柳絲絲變嫩黃海門遙望色微茫
賈航商舶連檣至
貢賫時看集萬方

察永定河

源從自馬邑溜轉入桑乾
渾流推濁浪平野變沙灘
廿載為民害一時奏效難
豈辭宵旰苦須治此河安

巡子牙河建壩

暫別宮槐幸子牙近村處處少人家
清和微暑浮畦麥綠樹初陰接岸沙
隄外草荒艱籽粒淀中水淺捕魚蝦
黃童白叟望霖雨霖雨先施莫自賒

畿輔通志卷九